

Inatsisartut suleriaasianni § 37, imm. 1 naapertorlugu, matumuuna apeqqutit uku Naalakkersuisunut apeqqutigaa:

Utoqqalinersiat nunatta karsianiit tunniunneqartartut akileraarutitaqanngitsumik utoqqarnut tunniunneqartalissagaluarpata nunatta karsianut qanormita ukiumut naleqassava?

(Anders Olsen, Siumut)

Tunngavilersuut:

Naalakkersuisut isumaginninnerup iluani iluarsartuusseqqinnissat tamatumani utoqqaat atugaasa pitsanngorsaavigineqarnissaat ilanngullugit suliniuteqarnissartik oqariartuutigaat. Tamassumap soorunami qanoq ilusilimmik aaqiivigineqarnissaanik Naalakkersuisut siunniussaqaassamaarnerat paasisaqaarfigissallugu soqutiginarpoq.

Ukiuni makkunani inuuniarnikkut atukkat assigiinngitsutigut annertuumik ilungersunartumut saqisiminanerat oqaatigisariaqarpoq. Ineqarnermut akit qaffassimapput, inuussutissatigut pisiassat akitsorsimapput ikummatissatigullu pisiassat aamma akimikkut qaffasillutik. Taakkuinnaalluunniit utoqqaat inuuniarneranni annertuumik aningaasatigut artukkiisarnerat annertoorujussuuvoq.

Utoqqalinersiat pisortaniit tunniunneqartartut akileraarutitigut ilanngartuukkunnaaralarutsigit takorlooreersinnaavarput utoqqarnut ataasiakkaanut qanoq iluaqutaatigissagaluartoq. Aningaasap pisissutissap qaffanneratigut imminut pilersorsinnaassutsip annertusineranik kinguneqartussaavoq, taamaasillunilu aamma inuiaqatigiit iluanni aningaasat sulisinneqartut pitsanngoriartinneqarsinnaallutik.

Utoqqaat ukiorpassuarni inuiaqatigiinni kifartuussisimallutik akileraartartuusimallutillu utoqqalinerminni akileraartinneqanngikkaluarlutik utoqqalinersiaqalersinnaanissaat Naalakkersuisut iluarsartuusseqqinnissamut atatillugu isumaliutigisinnaasariaqaraat isumaqarpunga.

Apeqqutima ullut qulit iluanni akineqareersimanissaat kissaatigaara.